

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- 1 जम्मू-कश्मीर च 40 असेंबली सीटें लेई होआ'रदे चुनांस दे त्रीए ते अखीरले गेड़ लेई अभियान जोरें-शोरें कन्ने जारी।
चुनाएं दे त्रीये गेड़ दा मतदान पैहली अक्तूबर गी होगा।
- 2 रियासी ते राजौरी जिलें च रियासी आतंकी हमले दे पछौकड़ै च एनआईए आस्सेया छापेमारी कीती गई।
- 3 प्रधानमंत्री होर इस ऐतवारें 'मन की बात' कार्यक्रम दे राएं लोकें गी संबोधित करंगन।
- 4 कानपुर च भारत ते बंगलादेश बश्कार होआ'रदे दुए ते फाइनल टेस्ट मैच दे पैहले दिन बंगलादेश नै 3 विकेटें पर
107 रन्ज बनाए। बरखा करी अज्ज पैहले दिनै दा खेड्ड प्रभावत होआ।

<><><><><><>

ते हुन खबरें दी तफ्सील कन्नै विजय बजाज।

J&K Campaigning

जम्मू-कश्मीर च त्रीए गेड़ दे असैम्बली चुनाएं लेई प्रचार अपनी चरम सीमा पर पुज्जी गेदा ऐ। इस गेड़ तैहत कुल 40 सीटें लेई पैहली अक्तूबर गी मतदान होगा। जम्मू संभाग दिएं 24 सीटें लेई इस गेड़ तैहत चुनां होगा। इंदे च जम्मू जिले दिआं 11, कठुआ दिआं 6, उधमपुर दिआं 4 ते साम्बा जिले दिआं 3 असैम्बली सीटां ना। आकाशवाणी दे जम्मू संवाददाता मुजब, इनें चुनाएं च बीजेपी दे प्रचार अभियान गी बल देने लेई प्रधानमंत्री नरेंद्र मोदी कल जम्मू आवै करदे ना। ओहू जम्मू दे मौलाना आजाद स्टेडियम च इक रैली गी संबोधित करंगन। होरनें सियासी, पार्टिं दे बी बड्डे-बड्डे नेता जोरें-शोरें प्रचार करै करदे ना। कांग्रेस नेता राहुल गांधी होरें साम्बा जिले दे रामगढ़ च इक रैली अग्गे भाषण दित्ता जिसले के पार्टी नेता प्रियंका गांधी होर कल रैलिं गी संबोधित करंगन। असैम्बली चुनाएं दे त्रीए गेड़ तैहत कुल 40 सीटें लेई मतदान होना ऐ जिस करियै इस गेड़ दा चुनां हर इक पार्टी ते मेदवार लेई मता अहम ऐ। इंदे च जम्मू खित्ते दिआं 24 ते कश्मीर घाटी दिआं 16 सीटां शामिल ना। वोटें दी गिनतरी दा कम्म 8 अक्तूबर गी होगा।

<><><><><><>

ECI-J&K Poll

जम्मू-कश्मीर च दुए गेड दे असैम्बली चुनां च 57 इशारिया 3-1 फीसद मतदान दर्ज कीता गेआ ऐ। चुनां आयोग मुजब दुए गेड तैहत 6एं जिलें दिएं 26 असैम्बली हल्के च 58 इशारिया 3-5 फीसद मर्दे ते 56 इशारिया 2-2 फीसद महिलाएं वोट पाने दे अपने हक्के दा इस्तेमाल कीता। चुनां आयोग दे आंकडें मुजब रियासी जिले दी श्री माता वैष्णो देवी असैम्बली हल्के च सब्बनें शा मता 80 इशारिया 4-5 फीसद मतदान होआ। एहदे परेंत सुरनकोट च 74 इशारिया 9-4 दस्सग ते पुंछ-हवेली च 74 इशारिया 5-6 फीसद मतदान दर्ज कीता गेआ। हुन औंदी पैहली अक्तूबर गी असैम्बली चुनां दे त्रीये ते अखीरले गेड तैहत 40 विधानसभा सीटें लेई मतदान होग जिसले के वोटें दी गिनतरी 8 अक्तूबर गी होग।

<><><><><><>

District-Jammu

जम्मू जिले दे 11 असैम्बली हल्के लेई औंदी पैहली अक्तूबर गी होने आले चुनां दरान 12 लक्ख शा मते मतदाता वोट पाने दे अपने हक्के दा इस्तेमाल करडन। आकाशवाणी दे जम्मू संवाददाता मुजब, जम्मू जिले दिएं 11 असैम्बली सीटें-बिश्नाह, सुचेतगढ़, आरएस पुरा-जम्मू साउथ, बाहू, जम्मू ईस्ट, नगरोटा, जम्मू वेस्ट, जम्मू नार्थ, मढ, अखनूर ते छम्ब हल्के च कुल 12 लक्ख 977 मतदाता न जिंदे च 6 लक्ख 19 ज्हार 66 मर्द, 5 लक्ख 81 ज्हार 887 महिलां ते 24 थर्ड जेंडर मतदाता बी शामिल न। चुनां आयोग नै मतदाताएं दी सुविधा लेई 1 ज्हार 494 मतदान केंद्र बनाए न जिंदे चा 609 शैहरी इलाकें च ते 885 ग्रामीण इलाकें च न। इनें चुनां च 47 ज्हार 963 फर्स्ट टाइम वोटर बी मतदान करंगन। कुल मतदाताएं चा 18 फीसद बुजुर्ग मतदाता न ते इनें चुनां च उंदी भूमिका बी बडी महत्वपूर्ण होग। 60 बरें यां एहदे शा मते दी उम्मी दे इनें मतदाताएं दी गिनतरी 2 लक्ख 15 ज्हार 338 ऐ। जम्मू जिले च 100 शा 109 बरें दी उम्मी दे 404 मतदाता न जिसले के 110 शा 119 बरें दे 29 मतदाता ते 6 बुजुर्ग मतदाता ऐसे बी हैन जिंदी उम्र 120 बरें कोलां बी मती ऐ।

<><><><><><>

NIA-Raids

राश्ट्रीय जांच एजेंसी आस्सेया अज्ज रियासी ते राजौरी जिले दी कई थाहरें पर छापेमारी कीती जा'रदी ऐ। एह छापेमारी रियासी जिले च जून महीने होए दे शिवखोड़ी मंदर थमां वापस परतोआ रदे श्रद्धालुएं दी बस पर होए दे हमले दी पछौक्कडै च ऐ। आकाशवाणी जम्मू दे संवाददाता हुंदी रिपोर्ट मुजब अज्ज बडुलै सवेला थमां गै एनआईए दी बक्ख-बक्ख टीमें राएं एह छापेमारी कीती जा'रदी ऐ। 9 जून गी होए दे इस आतंकी हमले च 41 लोक जख्मीं होए हे जेडे बस पर सवार हे। इस बारै जानकारी दिंदे होइ, स्हाडे जिला संवाददाता होरें गलाया जे आधिकारिक सूत्रें मुजब एनआईए दी टीमें गी इस हमले सरबंधी किश सबूत बी मिले न।



Traffic-Restiction

कल प्रधानमंत्री नरेंद्र मोदी होर जम्मू दा दौरा करा'रदे ना। ओह इत्थूं दे एम.ए स्टेडियम च चुनां रैली दा संबोधन करडना। उंदे दौरे गी मद्देनजर रखदे होई ट्रैफिक पुलस नै कल्लै लेई ट्रैफिक एडवाइजरी जारी कीती जेदे मुजब उत्तरी जम्मू थमां लेइयै दक्षिण जम्मू तोड़ी जाने आसतै या फही उत्थूं परतोने आसतै लोकें गी 4 जून तवी पुल या फिर गुज्जर नगर पुल दा इस्तेमाल करने आस्तै आखेआ गेआ जेडे लोक रैली च हिस्सा लैना चाहंदे न, उनेंगी सलाह दिती जा'रदी ऐ जे ओह अपनी गड्डियां दिते गदे पार्किंग लोट च लॉट च लान। इस बारै होर जानकारी लैने लेई ट्रैफिक विभाग नै ट्रैफिक कंट्रोल इकाई जम्मू दे नंबर जारी कीते ना। पैहला नंबर ऐ 0191-2459048, दुआ नंबर ऐ 94191-47732



Holiday-Cancel

जम्मू दे जिला मैजिस्ट्रेट होरें 30 सितंबर गी जिले दे शिक्षा इदारे च छुट्टी दे अपने पैहले आले हुकम गी रद्द करी दिता ऐ। अपने हालिया हुकम च जिला मैजिस्ट्रेट होरें आखेआ ऐ जे उनें 30 सितंबर गी सब्बनें सरकारी ते निजी शिक्षा इदारे च छुट्टी दा जेहडा हुकम रसाल कीता हा, उसी हुन रद्द करी दिता गेआ ऐ ते 30 सितंबर गी हुन शिक्षा इदारे च छुट्टी नेई होग।



SVEEP-Kathua

पैहली अक्तूबर गी होने आहले त्रीये ते अखीरले गेड दे असैम्बली चुनाएं दे मद्देनजर जिला प्रशासन कठुआ आस्सेया मतदाता जागरूकता लेई स्वीप तैहत कई गतिविधिएं दा आयोजन कीता गेआ। इससे सिलसिले च सरकारी हाई स्कूल लखनपुर च च इक सांस्कृतिक कार्यक्रम करोआया गेआ जेदे च नाटक ते होरनें गतिविधिएं राहें मतदाता जागरूकता दा स्नेहा दिता गेआ ते मगरा मतदान दी सगंध बी चुकाई गेई। इस मौके किश विद्यार्थिं गलाया।



ते हुन बाकी दिएं खबरें कन्नै सोनाली दत्ता।

PM-Modi

प्रधानमंत्री नरेंद्र मोदी होर इस रविवार बडुलै 11 बजे आकाशवाणी दे "मन की बात: कार्यक्रम उप्पर लोकें कन्ने अपने विचार सांझा करंगना। एह हर म्हीने होने आहले इस रेडियो प्रोग्राम दी 114मीं किशत ते प्रधानमंत्री हुंदे त्रीए कार्यकाल दी चौथी किशत होग। एह कार्यक्रम आकाशवाणी ते दूरदर्शन नेटवर्क AIR newswebsite ते newsonair mobile app उप्पर प्रसारित होग ते AIR

news.ddnews, PMO ते सूचना ते प्रसार मंत्रालय दे यू-ट्यूब चैनलें उप्पर लाइव चलोग। आकाशवाणी इस प्रोग्राम गी हिंदी दे बाद होरनें राष्ट्रीय भाषाएं च बी प्रसारित करोग।

<><><><><><>

Ek ped Maa ke Naam

मुख्य भरै च एक पेड़ मां के नाम अभियान तैहत हुनै तोड़ी 80 करोड़ बूट्टे लाए जाई चुके दे ना। पर्यावरण जंगलात ते मौसम सरबन्धी मैहकमे नै 80 करोड़ बूट्टे लाने दे अपने लक्ष्य गी पूरा करी दित्ता ऐ। मंत्रालय दी जानकारी मुजब एह लक्ष्य अपने समें सीमा थमां 5 दिन पैहले गै यानि 25 तरीक गी गै पूरा होई गेआ ते मंत्रालय नै इस सफलता दा श्रेय सरकारी एजेंसिएं गी, मकामी समुदायें गी ते बाकी हिस्सेदारें गी दित्ता ऐ। प्रधानमंत्री नरेंद्र मोदी होरें इस पैहलकदमी एक पेड़ मां के नाम दी शुरूआत इस बरै दे विश्व पर्यावरण दिवस 5 जून गी नमीं दिल्ली च कीती ते इस अभियान च मुख्य भरै दे लोकें बूट्टे लाने च बधी चड़ियै हिस्सा लैता।

<><><><><><>

LG-Tourism

विश्व सैलसफा ध्याड़े पर लेफ्टिनेंट गवर्नर मनोज सिन्हा होरें दुनिया भरै दे लोकें गी जम्मू-कश्मीर केंद्र शासित प्रदेश च आने आस्तै आखेआ। सोशल नेटवर्किंग साईट 'एक्स' पर इक्क पोस्ट दे राएं एलजी होरें दुनिया भरै दे लोकें गी साद्दा दित्ता ते आखेआ जे उनेंगी जम्मू-कश्मीर च आइयै इत्थूं दी खूबसूरती, समृद्ध सांस्कृतिक विरासत गी दिक्खने आस्तै इस स्वर्ग जनेई भूमि च आना लोडचदा।

<><><><><><>

Katra Festival

जम्मू दे डिविजनल कमिशनर रमेश कुमार होरें सलाना होने आहले नवरात्र समारोह जेड़ा 3 अक्तूबर थमां कटड़ा च शुरू होआ'रदा ऐ ओहदी त्यारियें दा अज्ज जायजा लैता। इस बैठक च सैलसफा मैहकमे दे निदेशक होरें इस समारोह च होने आहली गतिविधियें गी विस्तार च दस्सेया। डिवकाम होरें नवरात्रें दरान इत्थूं दी ट्रैफिक, साफ-सफाई ते लोकें आसतै जरूरी ते एमरजेंसी सेवाएं पजाने बारै बी गल्लबात कीती ते उनें अधिकारियें गी दोमेल थमां लेइयै कटड़ा तोहड़ी खास करियै नवरात्रें दे दिनें च साफ-सफाई दा ध्यान रक्खने लेई बी निर्देशित कीता। स्हाड़े आकाशवाणी संवाददाता देवेन्द्र ठाकुर हुंदे कन्नै इस बारै गल्ल करदे होई डिवकाम रमेश कुमार होरें आखेआ।

<><><><><><>

Handicrafts

केंद्री कपडा मंत्रालय हेठ दस्तकारी सेवा केंद्र जम्मू, जम्मू हाट च 11 थमां लेइयै 17 अक्तूबर तोडी 7एं दिनें दा गांधी शिल्प बजार दा आयोजन करा'रदा ऐ। दस्तकारी सेवा केंद्र दे जिला दस्तकारी विकास कमिशनर जम्मू हुंदी जानकारी मुजब इस शिल्प बजार च मुल्ख भरै दे राज्य पुरस्कार हासल होए दे 50 थमां बी मते कलाकार इस बजार च आइयै अपनी कला दा प्रदर्शन करडन।

<><><><><><>

Cricket

भारत ते बंगलादेश बश्कार कानपुर च खेड्डे जा'रदे दुए टेस्ट मैच दे अज्ज पैहले दिनें दा खेड्डे बरखा करी प्रभावित होआ। बंगलादेश नै 3 विकेटां मुहाइयै 107 रन्ज बनाई लैते दे ना। बंगलादेश दे मोमीनुल हक 40 रन्ज ते मुशफिकुर रहमान 6 रन्ज बनाइयै क्रीज पर हे। भारत दी तरफा अर्शदीप नै 2 ते रविचंद्रन अश्विन नै इक विकेट लैती। एहदे शा पैहले भारत नै टॉस जित्तियै गेंदबाजी दा फैसला लैता।

<><><><><><>

Weather

जम्मू ते एहदे कन्ने जुडे दे किश इलाकें च अज्ज बड्डलै बरखा पेई जेदे करी इत्थूं दे लोकें गी गुम्म कोला छुटकारा मिलेया ऐ। जम्मू च अज्ज बद्दोबद्द तापमान 30.4 डिग्री सैल्यिस ते घट्टोघट्ट तापमान 21.3 डिग्री सैल्यिस दर्ज कीता गेआ। कश्मीर घाटी दे गुलमर्ग च मौसम दी पैहली बर्फ पेई गेई ऐ तोआई मैदानी इलाकें च होली थमां दरम्याने दर्जे दी बरखा पेई ऐ, जेदे करी तापमान घटेया ऐ। मौसम विभाग नै सिंथन टॉप, राजदान टॉप, पीर गी गली ते होर उच्चि थाहरें पर अगले 24एं घंटें दे अंदर हल्की बर्फ पौने दे असार दस्से ना।

<><><><><><>